

臺灣文獻叢刊第一一種

閩海紀要

夏琳

臺灣銀行經濟研究室編

臺灣文獻叢刊
第一二種

閩海紀要

中華民國四十七年四月出版

著者 夏琳

編輯者 臺灣銀行
經濟研究室

臺北市重慶南路

發行者 臺灣銀行

臺北市重慶南路

經售者 中華書局

臺北市重慶南路

印刷者 臺灣銀行印刷所

臺北市青島東路

中華民國六十八年三月影印版

臺灣文獻叢刊第一輯

3. 從征實錄 靖海紀事 靖海志 閩海紀事

定價：新台幣 元

版權

所有

編者：臺灣銀行經濟研究室編
出版者：衆文圖書股份有限公司

地址：台北市重慶南路一段九號
電話：三一一九六八三

登記證：局版台業字第一五九三號

發行者：古亭書屋

地址：台北市景美與德路十二號
電話：九三二一六一〇六

經銷者：全省各書局
臺灣銀行研編字第〇〇六七號函同意出版

臺灣文獻叢刊 第一輯

本書影印

謹向 臺灣銀行經濟研究室 致謝

弁言

這本「閩海紀要」是根據連雅堂氏的「臺灣詩笈」本標點排印的。在「臺灣文化三百年紀念會」出版的「臺灣史料集成」裡，載有「臺南連雅堂氏藏」之「海紀輯要」的「寫真」。但是，一經比照，這一「寫真」的「海紀輯要」，與中央研究院歷史語言研究所的「海紀輯要」抄本大有出入，而與「臺灣詩笈」本的「閩海紀要」却全相同。因此，很可懷疑，本書原名「海紀輯要」，「閩海紀要」四字係由連氏改題的。至於兩書內容之所以不同，或許一爲初稿、一爲改正稿；這有待於專門的考證了。茲錄「臺灣詩笈」本的連氏原序於下，以供參考；但其中並無「改題」之言。

「余居承天，延平郡王之東都也。緬懷忠義，冀鼓英風；憑弔山河，慨然隕淚。洎長讀書，旁及志乘；而記載延平，辭多誣譌，余甚恨之。弱冠以來，發誓述作，遂成「臺灣通史」三十六卷；尊延平於本紀，稱曰「建國」。所以存正朔於滄溟、振天聲於大漢也。筆削之間，搜求故籍，其載延平者，則有黃宗羲氏之「賜姓始末」、鄭亦鄒氏之「鄭成功傳」、江日昇氏之「臺灣外記」、鷺門夢莽氏之「海上見聞錄」，皆實錄也。今乃復得「閩海紀要」，讀之狂喜；以爲漢族不湮，此書其必顯矣。書爲泉南夏元斌先生撰，而陳鐵香太史所藏者。起隆武元年，訖永曆三十七年；凡鄭氏三世之事，編年

繫月，巨細靡遺；而尊崇延平，義如綱目，是正史也；且足補吾通史之缺。因繕副本，付之梓人。而延平之精忠大義、東都之締造經營、謀臣猛將耆舊名流之功勳文采，炳炳琅琅，並傳天壤，豈非一大快事哉？東寧滅後二百四十有二年歲次甲子冬至日，臺南連橫序於大遯山房。

因爲本書原由連氏「傳繕印行」，所以錯字、脫字特多。茲經吳幅員兄參考「海紀輯要」及其他有關著作，悉心校勘。凡屬舛誤之處，則逕予改正；凡涉疑義之處，或於改正之後再用（）註明原文，或於原文之下用〔〕註明疑是或疑漏之文，亦有附？號以存疑者；其有衍文而予刪去者，亦經註明。如此，總計凡九十餘處之多，非易事也。

周憲文於臺北惜餘書室。

閩海紀要卷之上

泉南夏琳元斌撰

乙酉、大清皇帝順治二年（明隆武元年）夏、閏六月，明主（原文爲立）唐王聿鍵稱帝於福州。

初，唐王統兵勤王，以擅離南陽，錮禁獄。及宏光立，赦出，而南都破；靖虜伯鄭鴻達遇於嘉興，語合，遂奉以入閩，與其兄南安伯芝龍謀立之。閏六月十五日即位；陞福州爲天興府、布政司爲大內，改元隆武。

明晉南安伯鄭芝龍平虜侯，尋封平國公；鎮海將軍鄭鴻達定虜侯，尋封定國公；鄭芝豹爲澄濟伯。

芝龍字飛黃，南安石井人。兄弟四：長芝龍，次芝虎，三鴻達，四芝豹。初爲海盜，崇禎戊辰歸誠。以平海寇功，累遷至南澳總兵。甲申之變，宏光即位南京，封南安伯。至是，以翊立功，晉芝龍平國公、鴻達定國公、芝豹澄濟伯。

明主召芝龍子成功，賜姓朱，封忠孝伯。

成功原名森，字大木；天啓甲子年七月十五日生於日本。誕時萬火齊明，丰儀秀整。七歲取回，椒儻有大志。年十五，補南安弟子員；試高等，食餼。赴省試，

有金陵術士相之，驚曰：『君非科甲中人也，殆王侯相矣！』時方銳志場屋，不以爲然。及隆武召見，奇其狀貌，封忠孝伯；撫其背曰：『惜朕無一女配卿，卿當盡忠吾家，無相忘也！』因賜姓朱，改名成功。自是，中外咸稱國姓云。

明以鄭鴻達爲大元帥，出浙東；鄭彩爲副元帥，出江西。

二將既出關，疏言餉缺。逗遛不前。

丙戌、三年（明隆武二年）春、正月，明主以忠孝伯成功爲御前營內都督，賜尙方劍，儀同駙馬；尋封命佩招討大將軍印，鎮仙霞關。

時軍國大事，皆取決於芝龍；明主積不寧平，常獨居愁歎。成功進見，奏曰：『陛下鬱鬱不樂，得無以臣父有異志耶！臣受國恩，義無反顧，誓當以死報陛下！』明主嘉歎，故有是命。

秋、八月，鄭芝龍密撤仙霞關，大清兵入關。

芝龍以擁立非其本意，日與文臣忤。又度清朝神武，必不能偏安一隅，有叛意；密遣人以通內院洪承疇、黃熙允（胤？）。至是，聞魯監國杭州失守，乃稱餉缺，檄守將施天福回。

明忠孝伯成功兵潰於仙霞關。

芝龍聞清兵將至，密遣親吏到師納款。帥詰之曰：『吾兵未臨境，而前途獻降

書，得無詐乎？疑係細作，命推出斬之。吏疾聲呼冤；有閩人在軍中，察其詞哀，知其無詐，爲告于帥。帥曰：『歸語爾主，吾于秋仲提師由仙霞入關，可備壺漿以迎』。於是，芝龍遣心腹蔡輔至關，將授意於成功；輔入見，語未發，成功厲聲先謂曰：『敵師已迫而糧不繼，空釜司饗，吾將奈之何耶？速請太師，急發餉濟軍，慎勿以封疆付一擲也』！輔噤不敢發語，同見芝龍，備述前事；且曰：『向若道及納款，此頭已斷矣』！芝龍曰：『癡兒不識天命，固執乃爾；吾不給餉，彼豈枵腹戰哉』！賜姓屢請，皆不報。關兵無糧，遂逃散；成功不得已引還。至延平，登城周視，嘆息而回。

九月，明主下詔親征。師次延平，大清兵猝至；明主出奔，殂於將樂。

初，明主決意親征。於南臺祭江，忽風雨驟至，旗幟盡拔，不能成禮。成功跪榻前，泣奏曰：『臣父已有異志，陛下當自爲計』！因伏地鳴咽。明主掩袂揮淚，命之起；遂向延平。將幸轅，清兵猝至迫城。明主倉皇出奔將樂；追及之，遂遇害。

貝勒王入閩，鄭芝龍退保安平鎮，忠孝伯成功遁入海。

王兵至泉州，芝龍退保安平，軍容甚盛；以洪承疇、黃熙允之信未通，未敢迎師。王以書招之；略曰：『吾所重將軍者，正以將軍能立唐藩也。人臣事君，苟有

可爲，必竭其力；力不勝天，必投明主而事，乘時建不世之功，此豪傑事也。若將軍不輔立，吾何用將軍哉！且兩廣未平，現在鑄閩粵總督印以相待！」芝龍得書大喜，成功力諫不聽；遂降。十一月，〔將〕往福州見貝勒王，成功又泣諫；知不可挽，乃遁入海。芝龍至福州見貝勒王，王置酒相待，甚歡；忽夜半挾（原文爲扶）之北去，從者皆不得見。

丁亥、四年（明永曆元年） 明主永明王由榔稱帝於肇慶。

王爲神宗之孫、桂王之子，初封衡陽，以寇亂徙梧州。會桂王薨，兩廣總督丁魁楚與廣西巡撫瞿式耜擁立之；以肇慶府署爲行宮，改元永曆。

明招討大將軍忠孝伯國姓成功起兵。

初，芝龍既歸誠，以書諭成功速降；賜姓泣曰：「父教子忠，不聞以貳！」遂逸去。及芝龍北上，乃與所厚數十人舉義，收兵南澳。時年二十四，文移稱「招討大將軍罪臣國姓」。比聞永曆卽位，遣人間道上表，尊奉正朔。

明招討大將軍成功屯兵於鼓浪嶼。

時廈門先爲建國公鄭彩及弟定遠侯鄭聯所據。成功自南澳回，舊將稍集，乃移屯鼓浪嶼。以洪政、陳輝爲左右先鋒，楊才、張進爲親丁鎮，郭泰、余寬爲左右鎮，林習山爲樓船鎮，進攻海澄；清援兵至，洪政中流矢死，乃引還。

秋、八月，明大將軍成功會定國公鴻達攻泉州。

鴻達自芝龍歸誠，尙擁甲兵。至是，與成功合攻泉州；提督趙國祚率師與戰於桃花山，敗績；走入保城，鄭師進至城下。九月三日攻城，軍聲大振；漳州守將王進率兵來援，解圍。

戊子、五年（明永曆二年） 明主在桂林。

春、閏三月，成功取同安，以葉翼雲知縣事。

成功引兵攻同安，守將廉郎、知縣張効齡禦之；戰於店頭山，敗績，廉郎等棄城遁。成功入據之，以葉翼雲知縣事。翼雲、廈門人，庚辰進士，由吳江知縣擢吏部主事。

秋、八月，總督陳錦率師破同安，明知縣葉翼雲、教諭陳鼎、守將邱晉、林莊猷皆死之，屠其城。

泉州之圍，自冬徂春，郡邑戒嚴，所在蜂起。七月十三日，總督陳錦援師至。八月，遂克同安；邱晉、林莊猷戰歿，翼雲及陳鼎死之；屠戮無遺，凡五萬餘人。先是，有「同安血流溝」之讖；至是果驗。是歲大飢，斗米千錢。

明主封平國公部將洪旭爲忠振伯、張進爲忠匡伯、林習山忠定伯、陳輝忠靖伯，尋封陳霸（「輯要」作陳豹）爲忠勇侯、施天福忠毅伯。

己丑、六年（明永曆三年） 明主在肇慶。

春、正月，成功陷漳浦。

自同安敗後，成功往銅山募兵，命柯宸樞、黃廷等攻漳浦，守將王起鳳降；遂由雲霄抵詔安，移屯分水關，令黃廷、柯宸樞等守盤陀嶺。

四月，漳鎮王邦俊、副將王之剛敗中衝鎮柯宸樞於盤陀嶺，宸樞戰死。

漳鎮王邦俊與副將王之剛合兵攻盤陀嶺，黃廷不戰而走；柯宸樞分兵拒戰，衆寡不敵，與其弟中軍宸梅俱戰死。成功哀悼，厚恤其家，建祠祀之。

秋、七月，明主遣使晉招討大將軍忠孝伯國姓成功爲漳國公。

冬、十一月，成功伐潮州。

是年，全粵俱奉永曆正朔，土寇隨在竊據。守潮者，郝尙久也；自鴻逵據潮之揭陽，兩家各相疑忌。初，潮人黃海如、陳斌爲巨寇，歸成功；至是，導成功，遂入南陽，分兵勦許隆諸賊及達濠（原文建壕）、新墟等寨，悉平之。命太子太師鄭香守石尾城，有衆數千；後爲國朝所破，二子鄭廣、鄭海死焉。

庚寅、七年（明永曆四年） 春、正月，成功入潮陽。

成功引兵將至潮陽，知縣常翼風以城降；令洪旭駐鎮其地。

夏、六月，成功伐潮州。

成功遣甘輝殺賊黃亮采，復敗廣東邵提督軍於潮陽。

秋、八月，成功回師廈門，取定遠侯鄭聯軍兵。

時金、廈兩島尙爲建國公鄭彩、定遠侯鄭聯所據，肆虐不堪，民不堪命；其守將章雲飛（原文飛雲）尤橫。成功乃與陳霸議曰：『兩島本吾家土地，彼兄弟所據，肆橫無道，大爲不堪！』乃嚴部署，自揭陽回軍，於中秋夜抵廈門。聯方醉萬石巖，報至，不得入；詰朝出見成功於舟中，交拜甚歡。成功笑曰：『兄能以一軍相假乎？』聯未對，執銳者前矣，唯唯惟命。于是磨軍過船，聯將皆降，海上軍皆屬焉。惟彩率所部遁去，飄泊數年；成功招之還，以病卒于家。

冬、十一月，成功南下，命鄭芝鵬鎮守廈門。

成功至潮陽，提塘黃文自行在來，稱有旨徵賜姓率兵入援。

明主在南寧。

明招討大將軍漳國公成功起兵南下。

時平南王尙可喜、靖南王耿繼茂率滿騎數萬攻復廣州，西寧王李定國望援甚急。閏十一月，成功率各鎮官兵南下；十二月，抵揭陽。

辛卯、八年（明永曆五年）春、正月，成功率兵至南澳。

時施琅進曰：『勤王，固臣子職分；但琅昨夜得一夢，甚然不利。乞復細思！』成功默然；令將琅所佩左先鋒印及所轄兵將委副將蘇茂管轄，命琅同鄭鴻達回廈門，助芝鵬固守。成功率兵南下。二月，至白沙湖，颶風大作，船幾覆。三月，至大星所，殺退惠州援兵；攻其城，下之。

二月，巡撫張學聖會提督馬得功襲廈門，明文淵閣大學士吏部尚書會櫻死之。

成功兵南下，舟次平海衛；學聖、得功乘虛來襲廈門。時鴻達棄揭陽回師未至，芝鵬不能守；得功先遣數十騎渡五通登岸，兵民望見皆潰。時會櫻在城中，或邀之遁；櫻曰：『此一塊清淨土，正吾死所，豈復泛海求活耶！』遂自縊；時二月三十日也。門人阮旻錫、陳泰等冒險出其尸，鄉紳王忠孝殮之，殯於金門。奏聞永曆行在，追贈光祿大夫上柱國太師，諡文忠，賜祭葬；蔭一子中書舍人、一子錦衣衛，世襲。

夏、四月，成功回師廈門，承制殺鄭芝鵬。

先時，馬得功既入島，張學聖及興泉道黃澍于三月初一日至；見廈門孤懸海外，汪洋萬頃，愕然曰：『此絕地也！若有緩急，援兵豈能渡哉！』即先引回。不數日，鴻達至，截港圍攻。得功欲退，不得渡，窘甚；乃謂鴻達曰：『公等家口皆在安平，脫得功不出，恐不利公家！』鴻達患之，且不虞（疑有脫字）。成功旋師，

得功渡海已三日矣；成功大悔恨，按芝鵬以失守罪罪之，奉尙方劍斬以徇；諸將股栗，兵勢復振，凡六萬餘人。鴻達退泊白沙，築寨居之。

明左先鋒施琅來降。

琅，晉江人也。事成功，年最少，知兵善戰；自樓櫓、旗幟、陣伍之法，皆琅啓之。前在南澳，兵付蘇茂代將，意同必復任；成功不與，遂請爲僧。成功令再募兵，許授前鋒鎮。偶有親丁曾德逃於成功營，琅擒治之，成功馳令勿殺，琅竟殺之；成功大怒，捕琅並逮其家口。琅乘間逸去，密渡安平，依鄭芝豹；成功收其父大宜及其弟援勦左鎮施顯，殺之。

五月，成功入南溪。

成功自同廈門，申嚴紀律，軍聲大振。率衆入漳之南溪，漳鎮王邦俊率兵迎戰，敗績；又敗於漳浦，降者數百人，漳州戒嚴。

冬、十一月，提督楊名高及鄭成功戰於小盈嶺，名高敗走。

名高自福州率步騎援漳，成功迎戰於小盈嶺；名高大敗，僅以身免。成功乘勢攻漳浦，守將陳堯策以城降。

壬辰、九年（明永曆六年）春、正月，成功攻海澄；守將郝文興以城降。

成功引兵向海澄。是日，潮乍漲，舟達城垣，守將郝文興降；成功以舉人黃維

璟、馮澄世先後知縣事。

三月，總督陳錦及鄭成功戰於江東橋，大敗；成功乘勢拔長泰，漳州屬邑俱下。

成功遣中提督甘輝攻長泰，遇副將王進於北溪。二人俱雄健著名，久念一決雌雄；乃奮戈傳矢，兩馬相當。自己至午，縱橫跌蕩，觀者踈踴。既而兩家兵至，乃解。王進入長泰，甘輝日夜攻城，弗克。會總督陳錦來援，成功選精銳迎戰於江東橋北。陳錦扭先年同安之捷，頗輕敵，全軍皆沒；奔回泉州。成功乘勢攻長泰，拔之；王進獨以數十騎遁入漳州城，屬邑俱下。

夏、四月，成功攻漳州。

成功引兵圍漳城。五月，浙鎮馬逢知（原名進寶）率兵來援，縱其入城；引兵出戰，連敗之，遂嬰城固守不出。成功累攻不下，乃壅（原文爲擁）鎮門之水灌之，堤壞不浸；復列柵圍之。城中食盡，人相食，枕藉死者七十餘萬人。

秋、七月，庫成棟殺其主總督陳錦歸成功，誅之。

陳錦軍於鳳尾山，愆江東之敗，號令峻刻；爲其僕庫成棟所刺，持首歸成功。成功數曰：『僕隸之人而叛其主，是大逆也；大逆何以勸後！』命斬以徇。成棟疾呼曰：『陳錦暴戾不仁，衆心已離；寬我一死，必有望風續至者；八閩可不勞而定也』。衆咸爲之請；成功曰：『得八閩者，一時之私利也；誅叛逆者，萬世之公義也』。